

PMKS lebih berhati-hati dalam kenaikan gaji – MEF

Oleh NOR SYAMIRA LIANA NOR ASHAHA 08 Mei 2023 01:16pm **Masa membaca: 2 minit**



Laporan muka depan akhbar Sinar Harian pada Isnin. Gambar kecil: Syed Hussain

SHAH ALAM - Persekutuan Majikan-majikan Malaysia (MEF) berpandangan bahawa syarikat perniagaan terutama perusahaan mikro, kecil dan sederhana (PMKS) akan lebih berhati-hati dalam meningkatkan perbelanjaan gaji kerana ia mempunyai kesan jangka masa panjang.

Presiden MEF, Datuk Dr Syed Hussain Syed Husman berkata, kebanyakan syarikat terutamanya PMKS berada dalam keadaan 'survival mode' yang akan berhemah berbelanja termasuklah pemberian kenaikan gaji

“Kebanyakan syarikat memberi peluang pekerja untuk meningkatkan pendapatan melalui amalan di tempat kerja yang mana ia lebih fleksibel seperti formula ‘menang-menang’ kepada kedua-dua pihak (pekerja dan majikan).

“Kerajaan sepatutnya membantu PMKS terutama perusahaan mikro supaya dapat bangkit untuk mengekalkan perniagaan dan bukannya memperkenalkan dasar yang akan menambah beban kepada majikan,” katanya kepada Sinar Harian pada Ahad.

Sebelum ini, media tempatan melaporkan syarikat di Malaysia dijangka memperuntukkan bajet gaji yang lebih tinggi pada 2023, sebahagian besarnya dipengaruhi oleh keadaan pasaran buruh yang kompetitif dan tekanan inflasi yang didorong oleh kenaikan kos sara hidup, menurut syarikat penasihat, broker dan penyelesaian global, WTW.

Berdasarkan Laporan Perancangan Bajet Gaji 2022, WTW memaklumkan organisasi di Malaysia diunjur meningkatkan belanjawan mereka untuk gaji pekerja sebanyak lima peratus pada tahun ini.

Sementara itu, Syed Hussain berkata, kerajaan perlu menyokong usaha PMKS untuk berinovasi, menambah baik proses pendigitalan dan berkembang ke pasaran baharu supaya dapat meningkatkan sumbangan pembangunan terhadap pertumbuhan ekonomi negara.

Tambah beliau lagi, insentif cukai juga perlu dipertingkat kepada PMKS yang menggunakan teknologi canggih dalam memastikan daya saing dan peningkatan produktiviti.